

Engler vul centers da sport d'enviern decentral

Postulat da cusseglier dals chantuns Stefan Engler

DA MARTIN CABALZAR

■ **Cun in postulat inoltrà dacurt vul il cusseglier dals chantuns Stefan Engler (pcd GR) realisar trais u quatter centers da sport d'enviern decentral che duain vegnir realisads e manads da las regiuns per incumbensa da la confederaziun.** Avant trais onns ha il cussegl federal enconuschentamain sisti fin l'onn 2023 ils plans per realisar in Center naziunal per il sport d'enviern a Lai. Quai principalmain per motivs finanzials, dentant era per motivs da l'acceptanza politica. Apparentamain n'èn er ils plans da Lai da realisar il project ensemen cun il chantun betg daventads realitad cunzunt pervi da la prefinanziaziun da l'investiziun da radund 45 miliuns francs che fiss stada necessaria.

Da cuminanza enstagi in cunter l'auter

Sco quai che *Stefan Engler* argumentescha en ses postulat dispona la confederaziun cun Magglingen (BE) e Tenero (TI) gia da dus centers da sport nazionals che vegnan manads da l'Uffizi federal da sport. Tuts dus èn dentant adattads cunzunt per il sport da stad. Tenor Engler mancà dentant ina purschida sumeglianta per promover il sport da skis, quai ch'effectueschia ch'adina dapli giuvenils perdian la relaziun cun il sport d'enviern.

Il postulat dad Engler vegn era sustegnì dals collegas *Martin Schmid* (pld GR), *Isidor Baumann* (pcd UR), *Erich Ettlín* (pcd OW), *Jean-René Fournier* (pcd VS), *Beat Rieder* (pcd VS) e *Hans Wicki* (pld BE). I na sa tracta qua betg per casualitad d'exponents da las regiuns ch'avevan stuì laschar la preferenza a Lai tar l'evaluaziun per in sulet center naziunal da sport d'enviern. Ils ulterurs aspirants eran lezza giada Andermatt (UR),



Cun in nov concept decentral vulesc cusseglier dals chantuns Stefan Engler accelerar la realisaziun da centers per la promoziun dal sport d'enviern en las regiuns muntagnardas.

MAD

Engelberg (OW) e Fiesch (VS). Questa trumpada è apparentamain era stada ina da las raschuns politicas per sistir per il mument la planisaziun dal center naziunal prevedi a Lai. «Nus duvrain ina soluziun che na preferescha betg ina singula regiun e che na custa betg dapli ch'in singul center», ha ditg Engler. Cun ses postulat veglia el deblocar in pau la situaziun ed accelerar las preparativas per finalmain realisar a moda decentrala

la questa idea concreta che saja impurtanta per la promoziun dal sport d'enviern.

In concept decentral

Il postulat e ses consignats envidan perquai il cussegl federal da documentar las pussaivladads da realisar trais u maximal quatter centers da sport d'enviern regiunals en Svizra. La finamira da quest'evaluaziun duai esser da sclerir tge premissas

che ston vegnir ademplidas per realisar en ils lieus menziunads tals centers da sport d'enviern. Il rapport duai plinavant documentar tge premissas legalas che ston vegnir creadas per pussibilitar la realisaziun ed il manaschi da tals centers per la promoziun dal sport d'enviern, quai cun agid da la confederaziun ed ensemen cun ils chantuns da domicil u cun l'intervenza privata. Cuntrari al concept oriund na fiss betg pli la confederaziun la

realisatura e manadra d'in tal center, ma bain in purtader local.

Purschidas cumbinadas cun l'infrastructura existenta

Malgrà che la confederaziun ha sisti la planisaziun d'in center naziunal fin l'onn 2023 han divers chantuns sviluppà vinavant projects adattads. «Cun l'idea d'in concept decentral cun trais fin quater lieus e cun adossar la responsabladad per la realisaziun ed il manaschi a purtaders regiunals pudess ins facilitar ina realisaziun speditiva da tals stabiliments», è Engler persuadi. Ils novs centers duain numnamain vegnir realisads a moda adattada ed en cumbinaziun cun las infrastructures per il sport d'enviern gia existentas. Las purschidas decentralas duain primarmain servir a la realisaziun da curs da scolaziun e perfecziun sportiva ed era star a disposiziun per scolasts e trenaders da giuventetgna e sport. Plinavant duain els servir per alloschi e dunsena per champs dals differents sports d'enviern e sche quai è cunvegnent era star a disposiziun per trenaments dal sport da prestaziun. Per quest intent stoppian ils centers metter a disposiziun infrastructures e servetschs adattads. La confederaziun sustegna uschia primarmain purschidas specificas ed adattadas als basegns concrets per promover il sport d'enviern. Sco quai che Engler punctuescha stoppia ina tala purschida metter a disposiziun servetschs per viadis, pernottaziuns, proviantaziun, material da sport ed adiever dals stabiliments da sport per cundiziuns favuraivlas. Er als basegns specificas da persunas cun impediments saja d'attribuir en quest connex l'attenziun tutganta, di Engler. Plinavant duain ils lieus dals centers era pudair offrir ina purschida attractiva da stad per uschia garantir in niz dals stabiliments sur tut l'onn.